

## **Ilinniarnertuunngorniarluni ilinniakkami naliliisarneq aamma uppersaasiisarneq pillugit Namminersorlutik Oqartussat nalunaarutaat nr. 1, 23. januar 2015-imeersoq**

Ilinniarnertuunngorniartarneq pillugu Inatsisartut inatsisaanni nr. 13, 22. november 2011-imeersumi § 40, imm. 5, § 42, imm. 4, § 44, imm. 3, § 45, imm. 2, § 46, imm. 2, oqaaseqatigiit kingulliit, § 46, imm. 3, oqaaseqatigiit kingulliit, § 50, § 51, imm. 5 aamma § 53, imm. 2 naapertorlugit aalajangersarneqarput:

### **Kapitali 1**

#### *Ingerlaavartumik naliliisarneq*

##### *Nalilerneqartoq, tunngaviusut siunertallu*

**§ 1.** Ilinniartitsinerup ilinniartunit ataasiakkaanit qanoq pissarsiffigineqarnera pillugu ingerlaavartumik naliliisoqartassaaq.

*Imm. 2.* Ilinniartitaanerup ingerlanerani tamarmiusumi naliliisoqartassaaq.

*Imm. 3.* Naliliinerni ilinniagaqartup nammineq imminut nalilernerani ilaatinneqartassaaq.

**§ 2.** Naliliinermi ilaassapput ilinniartup angusai aammalu ilinniartitaanermigut piginnaanerilersimasai allat.

*Imm. 2.* Ilinniartup angusaanik naliliinermi fagimi ilinniarneqartussatut siunnerfigineqartunut sanilliullugit uuttuisoqartassaaq.

*Imm. 3.* Ilinniartitaanermi ilinniartup pissarsiaasa nalilerneqarneranni ilinniarneqartussatut ineriartorfusussatullu ilinniagaqartup ilinniartitsisuni peqatigalugit anguniagassatut siunnerfiliussimasaanut sanilliussilluni nalilersuisoqartassaaq.

**§ 3.** Naliliinerup ilinniartoq paasissutississavaa nammineq ilinniakkamigut siuariartorneranut tunngatillugu, taamaaliornikkullu siunnersorneqarnissamut tunngavissanik ilinniartullu ingerlaqqilluni ilinniagaqarnissaanut ineriartornissaanullu tunngavissiilluni, tassuunalu ilinniarnernerup sammivissaanut tunngasumik aalajangiinissaanut fagillu sorliit taakkualu qaffasissusissaannut paasissutississavaa. Tamatuma saniatigut naliliinerup isumannaassavaa

1) ilinniagaqartup fagit qaffasissusaasigut qanoq inissisimanini ilisimassagaa, nammineq ilinniarnernerminik ingerlatsinissaminut ineriartornissaminullu tunuliaqutassatut,

2) ilinniartoq misilitsittarnernut sungiusarneqassasoq, namminerlu ineriartornerminik ilinniarnernerminillu naliliisinnaanermut sungiusassasoq,

3) fagini ataasiakkaani ilinniartitsisusup ilinniarnertuunngorniarluni ilinniarfimmi tamakkiisumik ilinniagaqartut ataasiakkaat klassillu tamarmiusup atuartitaanerminni ineriartornerat pissarsiaallu malinnaaffigisinnaassagai,

4) fagini ataasiakkaani ilinniartitsisup ilinniarnertuunngorniarlunilu ilinniarfimmi ataatsimut ilinniagaqartut atuartitaanerminnut tunngatillugu qanoq pissarsiaqartarnerminnik naliliinerat, tassunga ilanngullugu ilinniagaqartut atuartitaanerminnik naliliinerat ataatsimut ilisimasaqarfigissagaa,

5) fagini ataasiakkaani ilinniartitsisusup ilinniarnertuunngorniarlunilu ilinniarfiup ataatsimut siunnersuinissaminut pilersarusiornissaminullu tunngavissinneqarnissaa, ilinniagaqartup ilinniarnermi ingerlaqqinnissaanut ineriartoqqinnissaanullu, ilinniakkat sammivissaat eqqarsaatigalugit, faginik qinigaqarnissani taakkualu qaffasissusissaanni, aamma ilinniartitaanerup aqqissuunneqarneranut siunnersorneqarnikkut, tassunga ilanngullugit immikkut aqqissuussanik ingerlatsisoqarsinnaanera, aamma

6) angajoqqaatut oqartussaassuseqartunut ilisimatitsissuteqarnissamut ilinniarnertuunngorniarluni ilinniarfiup ilinniartup ilinniarnermi pissarsiarisai pillugit tunngavissai.

*Imm. 2.* Kiisalu naliliineq tunngavissiissaaq rektorip ilinniartup 1.G-miit 2.G-mut, 2.G-miit 3.G-mut ingerlaqqissinnaaneranut naammattunik pissarsiaqarsimanersoq, maannamut atuartitaanermi pissarsiarisimasai ataatsimut eqqarsaatigalugit, § 12 naapertorlugu.

#### *Nalilisarnerup aqqissuunneqarnera*

§ 4. Rektorip isumannaartassavaa klassinut tamanut nalilersuisarnermut pilersaarummik suliaqartoqartarnissaa, imaattunik imaqartumik:

- 1) Atuaqatigiit klassip iluani misilitsittarnerannut takussutissiaq.
- 2) 1.G-mi fagini tamani qaqugukkut angusanut tunngatillugu karakteriliisoqartarnersoq pillugu takussutissiaq, tassunga ilanngullugu tunngaviummik ilinniakkami, 2.G-mi aamma 3.G-mi.
- 3) Ilinniartunut tamanut ingerlaavartumik aqqissuussamillu qanoq angusaqarsimaneq pillugu fagini tamani ilisimatitsissuteqartarnissamut pilersaarut, tamatumunnga ilanngullugu oqaaseqaateqarnemi.
- 4) Nalilersuisarnerit ilinniartunik siunnersuinermit atorneqarnissaannut pilersaarutit.
- 5) Angajoqqaatut oqartussaassuseqartut ilinniartup nalilersuiiffiqarneqarnerani inernerusut pillugit ilisimatinneqarnissaannut pilersaarutit ilinniartunut tamanut atuuttut.

§ 5. Rektorip qulakkiissavaa ingerlaavartumik nalilersuisarnerit piffissami tamatumunnga naapertuuttumi ilinniartitsisut suliamut attuumassuteqartut akornanni oqaluuserineqartarnissaat, ilinniartitaanemullu pilersaarutit pisariaqartitsineq naapertorlugu iluarsiivigineqartarnissaat, aammalu pisariaqartitsineq naapertorlugu ilinniartut immikkut persoraataasumik suliaqarnissamut neqeroorfigineqartarnissaat.

§ 6. Semesterini tamani minnerpaamik angusanut tunngatillugu karakteriliinermik ataatsimik fagini ilinniartitsiffiusuni tamani tunniussisoqartassaaq, ilinniarnermi periaatsit ilanngunnagit, taamaattoq takukkit imm. 4 aamma 5.

*Imm. 2.* Fagini ukiup ilinniarfiusup naanerani naammassineqanngitsuni tamani aamma angusanut tunngatillugu karakteriliisoqartassaaq, ukiup ilinniarfiusup pineqartup naanerani.

*Imm. 3.* Angusanut tunngatillugu karakterit immikkut perorsaataasunik suliaqartoqarnissaanik aallartitsinissap aalajangiiffigineqarnissaani tunngavigineqartussanut ilaatinneqassapput.

*Imm. 4.* Ilinniartut allami soraarummeeruteqarsimaneq tunngavigalugu fagimi aalajangersimasumi atuartitaanerup ilaani annertuumik peqataannginnissamut akuerisaasut fagimi angusanut tunngatillugu karakteriliisoqassanngilaq, ilinniartup fagitigut ilisimasaanut tunngasumik naammattumik ilisimasassanik peqanngitsutut naliliisoqarpat.

*Imm. 5.* Ilinniartoq takkuttarnissamut pisussaaffik naammassisimangippagu angusanut tunngatillugu karakteriliisoqassanngilaq.

§ 7. Ilinniarnertuunngorniarfiup nammineq misilitsinnerit ingerlatassami qanoq ittuunissaat annertussusissaat qaqugukkullu ingerlanneqarnissaat aalajangissavaa, ilinniartut tamarmik ataasiakkarlutik misilitsinnissat tamaasa sioqqullugu naammaginartumik annertussusilimmik misilitsinnissamut sungiusarnissaminnut periarfissaqarsinnaanngorlugit.

*Imm. 2.* Misilitsinnerni tamani ilinniarnertuunngorniarfiup iluani misilitsinnermut karakteriliisoqartassaaq.

*Imm. 3.* Ilinniarnertuunngorniarfimmi misilitsinnerit inerneru angusanut tunngatillugu karakteriliinissanut tunngaviusussanut ilaatinneqassapput aammalu misilitsinnerni angusat pillugit ilinniartut tamarmik ilisimatinneqartassallutik.

§ 8. Ilinniarnertuunngorniarfiup tunngaviusumik ilinniarnernerup naanerani, aammalu 1. - aamma 2.G-ip naammassinerini ilinniartunut tamanut karakterit allassimaffiat suliarisassavaa, ukiumi ilinniarfiusumi pineqartumi kiisalu tunngaviusumik ilinniarnermi ilinniartup illup iluani misilitsinneri, angusanut tunngatillugu karakterit aamma taamaassimappat inaarutaasumik angusanut karakterinut uppersaataasut, takuuk § 65. Karakterit allassimaffiat ilinniartunit pissarsiarineqarsinnaassaaq, tassunga ilanngullugu periarfissaqarpat elektroniskiusumik aallersinnaaneq.

*Imm. 2.* Agguaqatigiissitsineq angusanut tamanut tunngatillugu karakterit akunnaalliliinertaqanngitsumik ukiumi ilinniarfiusumi tunniunneqartut ilinniartup klassimut tullermut ingerlaqqinnissaanut tunngavigineqartassapput, takuuk § 11, imm. 3.

*Angajoqqaatut oqartussaassuseqartut ilisimatinneqartarnerat*

§ 9. Angajoqqaatut oqartussaassuseqartut akuttoqatigiissaakkamik ilinniarnertuunngorniarfiup ilinniartup atuarnermi pissarsiaanut tunngatillugu naliliinernik ilisimatinneqartassapput.

*Imm. 2.* Ilisimatitsineq minnerpaamik semesterimi ataatsimi ataasiarluni pisassaaq.

*Imm. 3.* Ilisimatitsineq ilinniartup angusanut tunngatillugu karakterii aammalu misilitsinnerni karakterii, kiisalu ilinniartup atuarnermi tamakkiisumik pissarsiai pillugit oqaloqateqarnissamut neqerooruteqarnikkut pisassaaq.

§ 10. Ilinniartunut angajoqqaatut oqartussaassuseqartunit oqartussaaffigineqanngitsunut angerlarsimaffimmut ilisimatitsineq ilinniartup akuersereerneratigut aatsaat ingerlanneqarsinnaavoq.

### *Ingerlaqqinneq*

§ 11. Ilinniartup klassimut qaffasinnerusumut tullermut nuussinnaaneranut piunasaqaataavoq ilinniartup atuartitsineri naammattumik pissarsiaqarsimanissaa.

*Imm. 2.* Ukiup ilinniarfiusup naanerani rektorip ilinniartut angusaannut atuartitaanerminnilu pissarsiarisimasaannut tunngatillugit ataasiakkaarlugit naliliiffigisassavai.

*Imm. 3.* Ilinniartuq klassimut tullermut ingerlaqqinnissamut pisinnaatitaavoq, ilinniartuq ukiup ilinniarfiusup naanerani angusisimanissamut piunasaqaammik naammassinnissimaguni, takuuk § 95, imm. 4. Ilinniartup angusisimanissamut piunasaqaatinik naammassinnissimanerata naatsorsorneqarnerani – taamaattoqarsimappat, inaarutaasumik angusanut tunngatillugu karakterit ilanngunneqassapput, takuuk § 8, imm. 2.

*Imm. 4.* Ilinniartuq angusisimanissamut piunasaqaatinik naammassinnissimasoq, kisiannili misilitsissimanissamut piunasaqaatinik tamanik il.il. naammassinnissimanngitsoq, ilinniarnertuunngorniarfiup ilinniarnermut ileqqorissaarnissamullu malittarisassai naapertorlugit misilitsinnissamut innersuunneqarsinnaanermik annaasaqarsimasoq, klassimut tullermut ingerlaqqinnissaminut pisinnaatitaavoq, rektori ilinniartup ilinniarfimmit anisinneqarnissaanik aalajangersimanngippat.

§ 12. Rektorip taamaattoq takuuk § 11, imm. 3, ilinniartup 1.G-miit 2.G-mut, imaluunniit 2.G-miit 3.G-mut nuunnissaa itigartitsissutigisinnaavaa, nalilerneqarpat ilinniartuq ataatsimut isigalugu ilinniartitsineri ingerlanneqareersumik naammaginartumik pissarsisimanngitsoq. Rektorip tamatumunnga ilanngullugu nalilissavaa, ilinniartuq ilinniarnermik naammassinninniassalluni periarfissaqarnerisooq, perorsaanikkut immikkut ikiorsiissutaasunik aaqquissuussisoqarneratigut, tamatumunnga ilanngullugu immikkut aaqquissuussamik siunnersuinikkut iliuuseqarnerit.

*Imm. 2.* Pisariaqarpoq, kisiannili tunngavilersuutitut kisimiissinnaanani, ilinniartup klassimut qaffasinnerusumut ingerlaqqissinnaaneranut angusanut tunngatillugu karakterii semesterimi pineqartumi, piffissamiluunniit killiffiusumi angusisimanermit appasinnerunerat.

§ 13. Ilinniartuq klassimut tullermut ingerlaqqinnissamut itigartinneqarsimappat, ilinniarnertuunngorniarfimiit anisinneqassaaq, taamaattoq takuuk imm. 2.

*Imm. 2.* Ilinniartuq ingerlaqqinnissamut itigartinneqarsimasoq, Rektorip akuersineratigut klassimik atuarfigisimasaminik uteqqiinissaminut akuerineqarsinnaavoq, taamaattoq kingusinnerpaamik ilinniartuq ilinniarnermik aallartitsinerminniit ukiut tallimat qaangiutinnginneranni uteqqiisinnaalluni.

*Imm. 3.* Ilinniarnertuunngorniarfiup ilinniartup ilinniarnertuunngorniarfimiit anisinneqarneranut atatillugu ilinniartuq tassungalū angajoqqaatut oqartussaassuseqartut ilinniartup ilinniarnermik ingerlatsiinnarsinnaaneranut periarfissamik naleqquttumik

siunnersussavai, tamatumunnga ilanngullugu ilinniakkamut allamut nuunnissamut periarfissanik imaluunniit ilinniagaqarnissamut inuussutissarsiuteqalernissamulluunniit siunnersuinnermut.

## Kapitali 2

### *Inaarutaasumik naliliineq*

#### *Nalilerneqartoq, tunngaviusut siunertallu*

§ 14. Inaarutaasumik naliliineq ataatsimoortumik misilitsinnertut (ilinniarnertuunut soraarummeernertut) ingerlanneqassaaq, taamaattoq takuuk § 15, oqaluttariarsorluni misilitsinnertigut, allattariarsorluni misilitsinnertigut kiisalu 3.G-mi ilinniagaqartut ataasiakkaarlutik ilinniarnerminni suliaqarnerisigut. Allattariarsorluni misilitsinneq allattariarsorluni suliatut, suliniuteqarnikkut misilitsinnertut imaluunniit pisimasuutitaliornikkut (case) ingerlanneqarsinnaavoq.

*Imm. 2.* Inaarutaasumik naliliinermi ilanngunneqassaaq fagini inaarutaasumik naliliineq, ilinniarnertuunngorniarfiup inaarutaasumik angusanut tunngatillugu karakterinik fagini tamani tunniussaqaqarnanunni atavillugu. Tamanna tunngaviusumik ilinniakkami timersornermi, ilinniarnerminni suliaqarnerini, ilinniarnermi periutsini aammalu ajornannigippat pisimasuutitaliornerni atuutinngilaq.

§ 15. Ilinniarnertuutut soraarummeerneq aammattaaq fagini ataasiakkaani misilitsinnermit angusanik katiterinikkut fagini pinngitsoorani misilitsiffigineqarsinnaasuni, fagini toqqarneqarsinnaasuni aammalu ilinniarnermi suliaqarnikkut ingerlanneqarsinnaavoq.

*Imm. 2.* Misilitsinnermi karakterit fagini ataasiakkaani uppersaatini karakterinit taarserneqarsinnaapput, takuuk § 95.

§ 16. § 14, imm. 1-imi soraarummeernerit pineqartut nammineq ilinniartunit misilitsiffigineqarsinnaapput, takuuk § 44.

§ 17. Ilinniarnertuutut soraarummeernermit ilaasinnaapput ilinniartitsissutini tamani misilitsinnerit, taamaallaat ilinniartitsissutit timersorneq, nipilersorneq aamma assilissanik eqqumiitsuliorneq qaffasissuseq C-miittut pinnagit, kiisalu ilinniartitsissutit science ilinniarnermilu periutsit pinnagit. Misilitsinnerit ilinniartitsissutit arlariinngorlugit ingerlanneqarsinnaapput.

*Imm. 2.* Ilinniarnertuutut soraarummeernermit ilaapput fagit pinngitsoorani misilitsiffigineqartussat, takuuk § 41, imm.1 nr. 8.

*Imm. 3.* Illassutitut fagini imm. 2-mi eqqaaneqartut saniatigut misilitsittoqassaaq, tamannalu ilinniartitaanermut Naalakkersuisumit soraarummeerfissatut makitsissutigineqartut tunngavigalugit aalajangerneqassaaq, takuuk § 40.

§ 18. Inaarutaasumik naliliinerup siunertaraa karakteritigut uppersaasissallugu ilinniartup ilinniartitaanermi fagini assigiinngitsuni ilinniarneqartussatut siunnerfiusunik qanoq annertutigisumik angusaqarsimanera.

*Imm. 2.* Inaarutaasumik naliliineq ilinniarnertuutut misilitsissimanermut uppersaammik tunniussinissamut tunngaviuvoq.

#### *Naliliisarnerup aaqqissuunneqarnera*

§ 19. Soraarummeerneq piffissami immikkut soraarummeernissamut immikkoortitami ingerlanneqartassaaq, tunngaviusumik ilinniarnep imaluunniit ukiup ilinniarfiusup pineqartup naammassineranut atatillugu.

*Imm. 2.* Tunngaviusumik ilinniarnep naammassinerani soraarummeerneq decembarimi ingerlanneqartassaaq. Soraarummeernerit nalinginnaasut maajimi juunimilu ingerlanneqartassapput (Aasaanerani soraarummeerneq). Napparsimasunik soraarummeersitsineq augustimi-septemberimi ingerlanneqartassaaq. Ilinniartitaanermut Naalakkersuisoq pineqartut saniatigut ukiup ingerlanerani piffissani allani soraarummeertoqarnissaanut akuersisinnaavoq.

*Imm. 3.* Misilitsinnerit aaqqissuunneqarlutillu ingerlanneqartassapput kapitali 4-mi tamatumunnga tunngasumik aalajangersakkat naapertorlugit.

### **Kapitali 3**

#### *Misilitsittarnermi periaatsit*

#### *Misilitsittarnermi periaatsinik toqqaasarneq ataatsimullu piareersaasiortarneq*

§ 20. Naliliineq ingerlanneqartassaaq oqaluttariarsorluni misilitsinnertigut, allattariarsorluni misilitsinnertigut, ilinniarnermi suliaqarnikkut, ajornangippat suliaqarluni misilitsinnikkut aammalu ajornangippat pisimasuutitaliornikkut.

§ 21. Misilitsinnerit aaqqissuunneqassapput ataatsimut isigalugu ilinniartitaanerup siunertaanut naapertuuttumik ilinniartullu ataasiakkaarlutik nalilersorneqarnissaannik isumannaarisumik.

§ 22. Ilinniarnertuunngorniarfik ilikkagassatut pilersaarutaasunut maleruagassat naapertorlugit misilitseriaatsit assigiinngitsut akornanni toqqaasinnaappat, toqqaaneq ilinniartumut atugassarititaasut, pissutsit atuuttut, aammalu soraarummeerneq ataatsimut isigalugu misilitseriaatsit nikerartut atorneqarnerisigut ingerlanneqassaaq.

#### *Allattariarsorluni misilitsinneq*

§ 23. Allattariarsorluni misilitsinneq tassaassaaq ilinniartitaanermut Naalakkersuisup suliasat ataatsimoortut suliarisimasai imaluunniit suliaritissimasai, ilinniartup

allattariarsorluni akisassai. Suliassiissutitut ataatsimoortunut siunnersuutit suliasanut kommissionimut ilinniartitaanermut Naalakkersuisumit pilersinneqarsimasumit suliarineqassapput.

*Imm. 2.* Suliassiissutit ilinniartumit akineqassapput ilikkagassatut pilersaarutaasunut piffissaliussap iluani. Allattariarsorluni misilitsinneq aallartissaaq suliassiissut tunniunneqarpat.

*Imm. 3.* Ilikkagassatut pilersaarummi allatut allassimasoqanngippat misilitsinnermi ikiorsiissutit tamarmik akuerisaassapput.

*Imm. 4.* Soraarummeertut, ilikkagassatut pilersaarummi imaluunniit misilitsinnerit ataasiakkaat pissusiinit allatut allassimasoqanngippat, misilitsinnermi ikiuussinnaanatiluk ikiorserneqarnermik tigusaqarsinnaanngillat, tamatumunnga ilanngullugu elektroniskiusumik allatulluunniit avatangiisiminnut attaveqarnikkut.

*Imm. 5.* Suliassanik suliaqarnermi allattariarsortoqarsinnaavoq imaluunniit qarasaasiamiit allagartat uppernarsaatit anillatsitat ilinniartumit suliarineqarsimasut atorneqarsinnaallutik. Ilinniartitaanermut Naalakkersuisoq tamatuma saniatigut akuersisinnaavoq akissuteqarneq ilinniartitaanermut Naalakkersuisumit akuerisaasumik aalajangersimasumik iluseqartumik qarasaasiakkut ingerlanneqarsinnaasoq.

*Imm. 6.* Rektorip isumannaassavaa akissutigineqartut utertinneqartut nalunaarsorneqarnissaat, tassunga ilanngullugu quppernerit qassiuneri, aammalu akissutigineqartut ilinniartumit nakkutilliisumillu atsiorneqarsimaneri, taamaattoq takukkit imm. 5-imi oqaaseqatigiit kingulliit.

#### *Oqaluttariarsorluni misilitsinnerit*

§ 24. Oqaluttariarsorluni misilitsinnertut paasineqassapput ilinniarnertuunngorniartuup suliaqarsimasut, ilinniartumut suliaqarsimasut ilinniartumit oqalutinnarluni akisassat.

*Imm. 2.* Ilikkagassanut pilersaarummi allatut allassimasoqanngippat suliasat nalinginnaasumik atuaqatigiinnut ilinniartitsisumit suliarineqarsimassapput.

*Imm. 3.* Ilikkagassanut pilersaarummi allatut allassimasoqanngippat suliaqarsimasut oqaasertaat ilanngussanik bilageqarlutik imaluunniit bilageqaratik ilinniartunit ilisimaneqariissanngillat.

*Imm. 4.* Suliaqarsimasut qanoq imaqarnissaannut aaqqissuunneqarnissaannullu tunngasut ilikkagassanut pilersaarummi ersissapput.

§ 25. Misilitsinnissami suliaqarsimasut fagimi ilikkagassat eqqarsaatigalugit sammiviit tamakkersimaniartussaavaat.

§ 26. Misilitsittoqarnissaa sioqqullugu piffissaagallartilugulu aammalu kingusinnerpaamik sapaatip akunnera sioqqullugu Ilinniarnertuunngorniartuup suliaqarsimasut ilinniartitaanerullu qanoq imaqarsimanager pillugu paasissutissat censorimut takuneqarsinnaasunngussavai, tassunga ilisimatitsissutitut aammalu pisariaqarpat oqaaseqarfigisassatut.

*Imm. 2.* Censori suliaakkiissutitut tunngasumik massuassutissaqaruni censorip ilinniartitsisoq suliame pineqartoq attavigissavaa, allannguutaasinnaasut pillugit oqaloqatiginiarlugu.

*Imm. 3.* Censori ilinniartitsisorlu suliaakkiissutit pillugit isumaqatigiissinnaanngippata censori nalunaarummik suliaqarsinnaavoq.

*Imm. 4.* Censorip ilinniartitsissutissanut tunngatillugu allaaserisaq amigaateqarsoriguniuk censoritut nalunaarusiorsinnaavoq.

*Imm. 5.* Ilinniartitsisup censorillu akornanni suliaakkiissutissat pillugit imaluunniit ilinniartitsissutissanut allaatigisamut tunngatillugu isumaqatigiinnngissutaasinnaasut ilinniartut nalilersorneqarneranni tunngaviginiarneqarsinnaanngillat.

§ 27. Suliaakkiissutissat atuaqatigiiaanut tamanut atuaqatigiinni ilinniartut amerlassusaanniit minnerpaamik pingasunik amerlanerusassapput. Suliaakkiissutissat atuaqatigiiaanut ataatsimut amerlanerpaamik pingasoriarlugit atorneqarsinnaapput.

§ 28. Ilinniartut tamarmik ataasiakkaarlutik misilitsinnerup aallartinnerani makitsinikkut suliaakkiissutitut tunineqassapput, ilikkagassanut pilersaarummi allatut allassimasoqanngippat.

*Imm. 2.* Makitsisoqarnerani censori ilinniartitsisorlu tamarmik najuutissapput. Pissutissaqartumik censori najuussinnaanngippat rektori imaluunniit inuk rektorimit toqqarneqartoq censorimut paarlattaasinnaavoq.

§ 29. Suliaakkiissutitut tunniussinerup kinguninnguatigut ilinniartup ilikkagassanut pilersaarummi piareersarnissamut piffissaliussaasoq naapertorlugu piareersarnini aallartissavaa.

*Imm. 2.* Ilikkagassanut pilersaarummi imaluunniit misilitsinnerit ataasiakkaat pissusiinit allatut allassimasoqanngippat allatut aalajangersaasoqarsimanngippat, ilinniartoq piareersarnermini ikiorserneqarsinnaanngilaq, tamatumunnga ilanngullugit elektroniskiusumik imaluunniit allatut iliorluni misilitsiffiup avataaniittunut attaveqarnikkut. Ilinniartulli immikkut perorsaanikkut ikiorsiissutitut isumagineqartartut imaluunniit atuarnissamik allannissamilluunniit ajornartorsiuteqartut ilinniarnertuunngorniarfiup ersarinnerusumik aalajangersagai naapertorlugit ikiorserneqarsinnaapput, tamatumunnga ilanngullugu piareersarnissamut piffissaliussaasup sivitsorneqarneratigut.

*Imm. 3.* Ilikkagassanut pilersaarummi allatut aalajangersaasoqarsimanngippat ilinniartup ikiorsiissutaasartut tamaasa piareersarnermini atorsinnaavai.

§ 30. Soraarummeersitsinermi ilinniartup taamaallaat ikiorsiissutit ilikkagassanut pilersaarummi allassimasut atorsinnaavai, piareersarnermit allattugaatit, qarasaasiakkoorsinnaasut aammalu atortussat soraarummeersitsinermi tunngavittut atorneqartussat.

*Imm. 2.* Soraarummeersitsineq ilikkagassanut pilersaarutini piffissaliussaasup iluani ingerlanneqassaaq. Saneqqutsinerit annikinnerusut pisinnaapput, naliliinissamut tunngavissat patsisigalugit. Ilinniartut immikkut perorsaanikkut ikiorsiissutitut atortoqartinneqartut,



imaluunniit atuarniarnermikkut allanniarnermikkullu ajornartorsiuteqartut ilinniarnertuunngorniarfiup aalajangersagai naapertorlugit sivisunerusumik piffissalernerqarsinnaapput.

*Suliniutini misilitsinneq, ilinniarnermi suliat aamma pisimasuutitat*

§ 31. Suliniutini misilitsinnertut paasineqassaaq suliassiissutaasoq suliniutissatut saqqummiussaasoq, ilinniartup suliassiissut suliniutip ingerlanneratigut akissuteqarfigisaa.

*Imm. 2.* Suliniummi misilitsinneq ingerlanneqassaaq suliniutissatut saqqummiussaasup suliarineqarneratigut, ilikkagassanut pilersaarutaasoq naapertorlugu.

*Imm. 3.* Suliniutissatut suliassiissutaasussaaq nammineq najukkami suliarineqarsimappat, ilinniarnertuunngorniarfiup isumannaassavaa, suliassiissut ilinniartup ilikkagassanut pilersaarutaasut naapertorlugit suliaanik naliliinissamut tunngaviusinnaasutut piukkunnartuunersoq qulakkiissallugu, ilikkagassanut pilersaarummi naliliinissamut aalajangersagaasut naapertorlugit.

*Imm. 4.* Suliniummik suliaqartitsineq suleqatigiissitani ingerlanneqassappat, ilinniarnertuunngorniarfiup suliap ingerlannissaanut killiliussassat aalajangersassavai, isumannaarniarlugu inernerusut misilitsittut ataasiakkaarlugit naliliiffiginissaannut tunngaviusinnaanerit.

*Imm. 5.* Suliat ingerlanneqarneranni ilinniarnertuunngorniarfiup ilinniartut ataasiakkaarlugit siunnersortassavai, ilikkagassanut pilersaarutini aalajangersagaasut tunngavigalugit.

*Imm. 6.* Ilinniartut avataaniit suliap ingerlannerani ikiorserneqarsimappata, imaluunniit oqaasertalianik allanit suliarineqarsimasunik atuisimappata, tamanna akissummi ersersinneqassaaq.

§ 32. Ilinniarnermi suliatut paasineqassaaq suliassiissut ilinniarnertuunngorniarfimmit ilinniartuq suleqatigalugu suliassiissutigineqarsimasooq qulequttap aalajangersimasup iluani, ilinniartut tamarmik immikkut suliaminnik piffissap suliniummik suliaqarfiusussap naanerani, piffissami atuartsiffiunngitsumi tunniussassaat.

*Imm. 2.* Suliassiissutit ingerlanneqarnerani ilinniarnertuunngorniarfik ilinniartumut siunnersuisassaaq ilikkagassanut pilersaarutini tamatumunnga aalajangersagaasut naapertorlugit.

§ 33. "Case" tassaavoq suliassiissut pissusiviusunut qanittumik aallaavilimmik pissutsinik ajornartorsiutinillu allaaserinnineq, ilinniartut suliassiisummik naalisaalluni imaqaarnersiukkamik saqqummiussinerat, suliassiisummi ajornartorsiutaasut aaqqiissutissaattut siunnersuutinik imaqartoq. Naalisaalluni imaqaarnersiutinertut suliaq ataasiakkaaraluni oqaluinnarluni misilitsinnermi tunuliaqutaassaaq.

## **Kapitali 4**

### *Misilitsittarnerit aaqqiissuunneqarneri ingerlanneqartarnerilu*

§ 34. Ilinniartitaanermut Naalakkersuisoq pingaarnertut akisussaasuvoq aammalu misilitsittarnerit soraarummeertarnerillu ingerlanneqartarnerat nakkutilliisuuffigalugu.

*Imm. 2.* Rektorip misilitsittarnerit soraarummeertarnerillu ingerlanneqartarnerat ilinniartitaanermut Naalakkersuisup killiliussassatut aalajangersagaasa iluanni akisussaaffigaa.

§ 35. Ilinniartitaanermut Naalakkersuisoq ukiut tamaasa soraarummeersitsinissanut ullorsiutinik aalajangersaasassaaq, ilinniartut soraarummeernissaata ukiumi pineqartumi qaqugukkut aallartinnissaanik imaqartumik, qaqugukkut misilitsinnerit suliassiissutinik qitiusumiit suliarineqarsimasunik imaqartut ingerlanneqarnissaannik imaqartumik, soraarummeerni suliassiissutit il.il. qaqugukkut aallartinneqarlutillu naammassineqarsimanissaannik imaqartumik, kiisalu napparsimaneq pissutigalugu pisariaqarpat qaqugukkut soraarummeertoqarsinnaaneranut piffissaliussanik aamma imaqartunik. Misilitsinnerit sinneri ilinniarnertuunngorniarfimmi namminerimi piffissaliussap iluani ingerlanneqassanersut rektorip aalajangissavaa.

§ 36. Soraarummeersitsinerit aallartiffiat soraarummeersitsinissanut pilersaarutit tamanut saqqummiunneqarnissaanut piffissaavoq.

§ 37. Ilinniartitaanermut Naalakkersuisup soraarummeersitsinerni aaqqissuussaanikkut iliuusissat tigussaasut aammalu periusiusussat aalajangersassavai.

§ 38. Ilinniarnertuunngorniarfik piffissanut soraarummeersitsiviusussanut ilinniarfiup pilersaarutaa suliarisassavaa, tassunga ilanngullugu soraarummeersitsinerit qaqugukkut naammassineqarnissaannut piffissaliusaaq. Siunnersuusiaq ilinniartitaanermut Naalakkersuisumit piffissaliussaasup naannginnerani ilinniartitaanermut Naalakkersuisumut ilisimatitsissutitut nassiunneqartassaaq.

*Imm. 2.* Ilinniartitaanermut Naalakkersuisup ilinniarnertuunngorniarfiit ataasiakkaarlugit censorinik atuinissaannut pilersaarutaat akuerisassavai.

*Imm. 3.* Soraarummeernissamut pilersaarutit tamanut takusassiarineqarnissaasa tungaanut pilersaarummut akuusut, tamatumunnga ilanngullugit censoriusussatut naatsorsuutigineqartut nipangersimasussaataapput fagit suut misilitsiffiusussaansut pillugit.

§ 39. Ilinniagaqarneq ataatsimoortoq imaqarpoq tungaviumik ilinniakkap naammassinerani soraarummeernermut piffissaliussamik, aammalu soraarummeernernut piffissaliussanik ukiut ilinniarfiusut tamarmik naalernerini ingerlanneqartussanik.

§ 40. Piffissanut soraarummeersitsiviusussanut tamanut soraarummeerutissat suunissaat makitsissutigineqartassaaq. Makitsinerup aalajangissavaa fagini sorlerni ukiumi atuarfiusumi ilinniartup misilitsinnissaa.

§ 41. Ilinniarnertuunngorniarfiup ilinniartitaanerup tamarmiusup aammalu misilitsiffissat tamarmiusut ingerlanneqarnissaat imatut aaqqissuuttassavaa

- 1) ilinniartitsissutini misilitsiffiusussatut ilimanaateqartuni nalunaaquttap akunneri atuartitsiviusussat tamarmik ingerlanneqarsimanissaat, piffissap soraarummeerfiusussap aallartinneqannginnerani,
- 2) ilinniartup piffissap atuartitaaffiusup ingerlanerani qaqugukkulluunniit naatsorsorsinnaassanngikkaa misilitsiffissat sorliit pinaviarnagit,
- 3) 2.G-mi piffissap atuarfiusup naannginnerani minnerpaamik ilinniartitsissutit marlut misilitsiffiqarsinnaasutut ilimanaateqartut naammassineqarsimanissaat,
- 4) ilinniartitsissummi qaffasissuseq A-miittut aatsaat naammassineqassasut 3.G-mi piffissaq soraarummeerfiusussaq sioqqullugu,
- 5) ilinniartitsissutit naammassineqarnissaat agguanneqareersimassasut piffissanut soraarummeerfiusussanut, taamaalilluni misilitsiffiusinnaasut ilinniagaqarnerup naammassiartuaarnerani amerliartuaartunngorlugit,
- 6) ilinniarnertuunngorniarfut tamarmik aallaavittut misilitsinnernik arfineq pingasunik ingerlatsisimassasut, kiisalu ilinniarnermi suliamik ataatsimik suliaqarsimassasut, taamaattoq takuuk nr. 7.
- 7) ilinniarnertuunngorniarfut tamarmik ilassutaasunik misilitsissasut, misilitsinnerit arfineq pingasut pineqartut saniatigut, tamanna normu 2-mi eqqaaneqartumik tunngaveqartumik,
- 8) tamatigut ilinniartitsissutini kalaallisut aamma danskisut, tuluttut qaffasissuseq B-mi aamma A-mi, matematik qaffasissuseq B-mi aamma A-mi aamma suliffeqarfiit aningaasaqarnerat qaffasissuseq B-mi aamma A-mi pinngitsoorani allattariarsorluni misilitsittoqartassasooq kiisalu tuniniaaneq A-mi aamma teknikkimik ilinniartitsissut A-mi pinngitsoorani misilitsittoqartassasooq aamma
- 9) misilitsittoqassanngilaq qaffasissuseq C-miittuni timersornermi, nipilersornermi, science-imi, ilinniarnermi periutitigut aamma assilissanik eqqumiitsuliornermi.

§ 42. Ilinniarnertuunngorniarfik ukiut tamaasa atuarnepup aallartinneqata kinguninngua piaartumik ilinniartunik ilisimatitsisassaaq soraarummeersitsinissat aggersut qaqugu aallartissanersut qaqugulu naammassissanersut pillugit.

*Imm. 2.* Ilinniartut tamatumunnga ilutigigitillugu ilisimatinneqartassapput ilinniartitsissutini tamani misilitseriaatsit atorineqartussatut pilersaarutaasut pillugit, ilinniartitsissummi atuartitsissutaasumi oqaatsit ilinniartitsissutaasut assigiinngissinnaanerit pillugu aammalu ilinniartitsissummi pineqartumi misilitsinnermi oqaatsit atorineqartussat pillugit, takuuk § 49, aammalu ilinniarnertuunngorniarfiup soraarummeertarnermut malittarisassai pillugit, malittarisassanilu ilaatinneqartussat makkua pillugit:

- 1) Napparsimaneq aamma takkutinnngitsoorneq tamatumalu kingunerisassai.
- 2) Ikiorsiissutit.
- 3) Takkussimanissaq.
- 4) Misilitsinnerup nalaani atassuteqaqatigiinnemut.

5) peqquserlunnerup suunerata nassuiaataa kingunerisassaalu.

6) Maalaaruteqarnissamut periarfissat periaatsillu.

7) Atugassarititaasut, assersuutigalugu qarasaasiamik il.il. atuisinnaaneq.

*Imm. 3.* Soraarummeersitsinissat aallartiffianni ullormi ilinniartut aammaloorluni ilisimatinneqassapput misilitsissutaasussanik makitsinerup inernerisai pillugit aammalu misilitsinnissanut piffissaliussaasut pillugit.

**§ 43.** Ilinniartuq fagip ilinniarneqartup naammassinissaanut inassutigineqassaaq.

*Imm. 2.* Inassuteqarnissamut tunngaviussaaq ilinniartup atuartitaanermut malinnaasimanera, tassunga ilanngullugu allattariarsorluni suliasanik suliaasiissutaasimasunik tunniussisarsimanera, allattariarsorlunilu suliat akuerineqarsimanerat, ilinniarnertuunngorniarfimmi tamatumunnga malittarisassat atuuttut naapertorlugit. Taamaattoqarpat, ilinniartuq ingerlaannartumik inassutigineqassaaq.

*Imm. 3.* Ilinniartuq, ilinniartitsissummi ataatsimi arlalinniluunniit misilitsinnissamut inassutigineqanngitsoq piffissap soraarummeerfiusussap aallartinnginnerani tamatuminnga ilisimatinneqassaaq.

*Imm. 4.* Ilinniartut, ilinniartitsissummi ataatsimi allami soraarummeerutigisimasaminnik nuutsinissamut tamakkiisumik akuerineqarsimasut aammaarlutik qaffasissutsimi tassani soraarummeeqinnissaminnut inassutigineqarsinnaanngillat.

**§ 44.** Nammineerluni ilinniartuq, tassunga ilanngullugu ilinniartuq ilinniarnertuunngorniarfimmi ilinniagaqarnissamut akuerisaasimasoq aamma nammineq ilinniartutut misilitsinnissamut innersuunneqarsimasoq, ilinniartitsissummi ataatsimi amerlanerusuniluunniit misilitsinnissamut nalunaarsinnaavoq.

*Imm. 2.* Ilinniarnertuunngorniarfiup nammineerluni ilinniartuq soraarummeernerup ingerlanissaa pillugu siunnersussavaa, misilitsinnissamilu tunngaviusut suunerinik oqaluttuullugu.

*Imm. 3.* Ilinniartitaanermut Naalakkersuisoq aalajangersaasinnaavoq piffissaliussanik nammineerluni ilinniartuusut misilitsinnissamut qinnuteqarnissaannut tunngaviusussanik.

#### *Misilitsinnerit ingerlanneqarnerat*

**§ 45.** Oqaluttariarsorluni misilitsinnerit suliniutinillu suliaqarnerup oqaluttariarsornikkut misilitsiffigisassartai aamma suliniutit imaluunniit misissuinerit (cases) pillugit oqaluttariarsorluni misilitsinnerit tamanut ammasuusarput, ilinniarnertuunngorniarfiup aalajangiinerata kingunerisaanik pissutsinik immikkut ittunik atuuttoqarsimangippat, tamanut ammasumik ingerlanneqarnissaanut akornutaasinnaasunik, imaluunniit ilinniartuq nammineq tamanut ammasumik ingerlatsisoqarnissaanut killiliinissamik kissaateqarsimangippat.

*Imm. 2.* Oqaluttariarsorluni misilitsittoqaremeratigut karakteriliiniarluni nalilersuinermi censori aamma soraarummeersitsisoq kisimik najuutissapput.

§ 46. Nipinik aamma assilissanik misilitsittoqarnerata nalaani immiussisoqarsinnaanngilaq, tamanna misilitsinnerup ilaginngippagu.

§ 47. Ilinniarnertuunngorniarfiup soraarummeertut sulinermikkut misilitsinnerup nalaani naammaginatunik atugassaqartissavaat, tamatumunnga ilanngullugu ilinniarnertuunngorniarfiup pitsaanerpaamik aaqjissuunniassavaa soraarummeertut pisariaqanngitsumik attaveqatigiissinnaanerat.

§ 48. Ilinniartoq, piffissaliussap iluani misilitsinnissamat takkutinnitsoq ilinniarnertuunngorniarfimmiit misilitsinnermut peqataanissamiit mattunneqarsinnaavoq.

*Imm. 2.* Mattussineq tunngavilersorneqarsinnaasariaqarpoq ilinniartup illersorneqarsinnaasumik misilitsinnermik ingerlatsisinnaannginneranik, imaluunniit inortuilluni aggernerup ilinniartut sinnerinut akornusersuutaasinnaaneranik.

*Imm. 3.* Inortuilluni takkunneq naammaginatunimik tunngavissaqartinneqarpat, ilinniarnertuunngorniarfik aalajangersinnaavoq ilinniartoq nutaamik misilitsissinnaasoq, napparsimasutut misilitsinnerusumik.

§ 49. Misilitsinnerit nalinginnaasumik ingerlanneqartarput ilikkagassanut pilersaarutini allatut allassimasoqanngippat oqaatsit ilinniartitsissummi atuartsissutaasimasut atorlugit. Censori oqaatsinik atuartsissutaasimasunik naammaginatunimik atuisinnaanngippat, misilitsinneq illersorneqarsinnaasumik qaffasissuseqartinneqarsinnaavoq oqaatsit censorimit atorneqartut aamma oqaatsit ilinniartitsissutaasut akuleriissillugit atorneqarnerisigut.

*Imm. 2.* Ilinniartitsissutini oqaasileriffiusuni misilitsinneq kalaallit aamma danskit oqaasii akuleriissillugit atorlugit ingerlanneqarsinnaavoq.

§ 50. Ilinniarnertuunngorniarfik misilitsittarnermut malittarisassanik suliaqassaaq, tamatumunnga ilanngullugu ilinniartut allattariarsorlutik misilitsinneranni nakkutillisoqartarneq pillugu. Tamannalu pissaaq ilinniartitaanermut Naalakkersuisup killiliussatut aalajangersagai naapertorlugit, takuuk § 37.

*Imm. 2.* Misilitsittarnermut malittarisassat imatut suliarineqarsimassapput, ilinniartut innarluuteqartut aammalu ilinniartut immikkut perorsaataasumik aaqjissuussaavigineqarsimasut misilitsissinnaanngorlugit atugassarititaasut immikkut ittut iluanni, ilinniagaqartup pisariaqartitsineranut naapertuuttumik aaqjissuussaasut.

§ 51. Ilinniartut, misilitsinnermi pineqartumi malittarisassanik malinninngitsut, tamatumunnga ilanngullugit pissusissarititaasut sanioqqullugit ikiorsiisut imaluunniit ikiorneqartut, piaaralutik allat allagaataannik namminneq suliarisimasamittut saqqummiussisut imaluunniit atortorissaarutinik iluaqutissanik akuersissutaanngitsunik atuisut misilitsinnermiit anisinneqassapput.

*Imm. 2.* Censorit anisitsinissaq pillugu aalajangiisinnaanngillat, kisiannili taamaallaat rektorimut tunngavilersukkamik anisitsinissaq pillugu inassuteqarsinnaallutik. Tamatumunnga ilanngullugu censori nalunaarummik tunniussaqaarsinnaavoq, takuuk § 77.

§ 52. Anisitsisoqarnissaa pillugu censori inassuteqarsimagaluaruniluunniit censori ilinniartup misilitsinnerani nalileeqataassaaq, ilinniarnertuunngorniarfik aalajangersimappat naliliinermik ingerlatsisoqassasoq.

§ 53. Misilitsinnerit immikkut ittutigut, pisariaqartunik pissutissaqartillugu, allami ingerlanneqarsinnaapput, tamatumunnga ilanngullugu illoqarfimmi allami, Danmark-imi nunamiluunniit allami.

*Imm. 2.* Rektorip isumannaassavaa misilitsinneq allami ingerlanneqartoq illersorneqarsinnaasumik ingerlanneqarsinnaasoq, tamatumunnga ilanngullugu soraarummeersitsisup censorillu piumasarineqartutut piginnaaneqarneri, aammalu ilinniartumut piumasarisat atugassarititaasullu nalinginnaasumik ileqqusunut naapertuuttuunerat.

§ 54. Misilitsinnerup ingerlanneqarnerani paasineqarpat misilitsissutaasoq kukkuneqartoq imaluunniit amigaateqartoq, taava ilinniarnertuunngorniarfik aalajangiissaaq iluarsineq qanoq isumagineqassanersoq, tamatumunnga ilanngullugu misilitsinneq taamaatiinnarneqassanersoq kingusinnerusukkullu nutaamik piffissaliilluni ingerlanneqarluni. Periarfissaqarpat ilinniarnertuunngorniarfiup aalajangiineq sioqqullugu nalilersuisut isumasiorsimassavai.

*Imm. 2.* Aaqqiissuteqarnek imatut suliarineqassaaq ilinniartut misilitsinnermini nalinginnaasumik atugassarititaasunut nallersuunneqarsinnaasunik atugaqarsinnaanngorlugit, tassunga ilanngullugu assersuutigalugu piffissap soraarummeerfiusussap sivitsorneqarneratigut.

*Imm. 3.* Ilinniarnertuunngorniarfiup nalilerpagu kukkussut ilinniartut naammassisaannut sunniuteqartoq, ilinniartut kukkunermit eqqorneqartut neqeroorfigineqassapput naliliiffigeqqinneqarnissamik imaluunniit misilitseqqinnissamik.

*Imm. 4.* Ilinniarnertuunngorniarfiup nalilerpagu kukkuneq annertuujusoq, rektorip misilitsinnerup ingerlasimanera ilinniartitaanermut Naalakkersuisumut nalunaarutigissavaa, tassangaaniillu aalajangiisoqarsinnaavoq misilitsinneq atorunnaarsinneqassanersoq taamalu misilitsinnermik nutaamik taarserneqassanersoq.

*Imm. 5.* Misilitsinnermi suliassat kukkunillit ilinniartitaanermut Naalakkersuisumit suliaappata imaluunniit piniagaasimappata, Ilinniartitaanermut Naalakkersuisup imm. 1-3-mi suliassat isumagissavai.

*Imm. 6.* Censori kukkunerit pillugit ilisimatinneqassaaq, misilitsinneq ingerlatiinnarneqarpat.

## **Kapitali 5**

### *Naliliisarnek*

§ 55. Nalilersuinermi Greenlandic Grading System skala atorlugu karakteriliisoqartassaaq.

§ 56. Ilinniartut tamarmik immikkut naliliivigineqartassapput misilitseriaaseq atorneqartoq apeqqutaatinnagu.

§ 57. Suliassiissutit anginerit aamma suliniutit ilinniartut suliarineqarnerini peqataaffigisaat tamarmik immikkut naliliivigineqartassapput.

*Ingerlaavartumik nalilersuisarneq*

§ 58. Ilinniagaqartut fagitigut piginnaasaasigut nalilersorneqartassapput angusanut tunngatillugu ataasiakkaarlugit karakteriliinikkut, ilinniarfimmi misilitsinnernut karakterit aamma oqaluinnarnermut allattariarsornermullu oqaaseqaatit aqutigalugit.

*Imm. 2.* Naliliinermi ilinniartup nammineq naliliinera anguniagaalu akulerunneqartassapput.

§ 59. Angusanut tunngatillugu karakterit ersersissavaat ilinniartup anguniagaasunik, ilinniartitsissutitigut anguniagaasunik, ilinniartitsissummi pineqartumi ilikkagassanut pilersaarutaasumi periutsinut imarisaanullu tunngasutigut piffissami karakteriliiffiusumi qanoq angusaqarsimanersoq.

§ 60. Ilinniarnertuunngorniarfiup iluani nammineq misilitsinnerni karakteriliinerit ersersitsissapput ilinniartut ataasiakkaarlugit ilinniartitsissutitigut ilisimasaannik, suliassiissutit tunngavigalugit ilisimasaqassutsimik, periaatsinillu atuisinnaanikkut angusaqarsimassusiannik.

§ 61. Oqaluttariarsorluni aamma allattariarsorluni oqaaseqaatit ersersitsissapput ilinniartut ataasiakkaarlugit ilinniartitsissutitigut ilisimasassanik suliassiissutaasut tunngavigalugit ilinniartitsissummi pineqartumi angusaqarsimassusiannik. Tassunga ilaassaaq ilinniartup angusaanut tunuliaqutaasut pillugit nassuiaat, aammalu ilinniartup ilinniartitsissummi pineqartumi qanoq sulinerminik ingerlatseqqissinnaanera pillugu nassuiaammik ilaqarsinnaalluni.

*Inaarutaasumik naliliineq*

§ 62. Soraarummeernermi karakteriliisoqartassaaq censorip peqataaneratigut.

§ 63. Ilinniartut angusanut tunngatillugu ilinniartitsissutini tamani karakteriliinikkut, takuulli § 14, imm. 2, aammalu ilinniartitsissutini misilitsiffiusuni misilitsinnermi karakteriliinikkut inaarutaasumik angusanut tunngatillugu karakterilerneqartassapput.

*Imm. 2.* Ilikkagassanut pilersaarutini nalunaarneqarsimapput ilinniartitsissutini ataasiakkaani karakterit qassiussanersut.

§ 64. Naliliinerup ersersippaa qanoq annertutigisumik ilinniartup ilinniartitsissutini ataasiakkaani ilikkagassanut pilersaarutaasunik angusaqarsimanera.

*Imm. 2.* Kiisalu naliliinermi akulerunneqassapput nalilersuinissamut tunngavissiat ilinniartitsissummi pineqartumi ilikkagassanut pilersaarummi ersittut.

§ 65. Inaarutaasumik angusanut tunngatillugu karakterit ilinniartitsissutip pineqartup naammassineqarneranut atatillugu ilinniartitsissummi ilinniartitsissuusumit tunniunneqassapput.

*Imm. 2.* Inaarutaasumik angusanut tunngatillugu karakterit ilinniartumut ilisimatitsissutigineqassapput soraarummeernissamut pilersaarutip tamanut saqqummiunneqannginnerani. Ilinniarnertuunngorniarfiulli piffissaliusaaq taanna kinguartissinnaavaa, tamanna ilinniartitsissutini ataasiakkaani pissutissaqartumik pisariaqartinneqarpat.

*Imm. 3.* Ilinniartitsissutini allattariarsorluni aammalu oqaluttariarsorluni misilitsiffiusuni inaarutaasumik angusanut tunngatillugu ilinniartup allattariarsorluni suliaanut karakteriliisoqarlunilu inaarutaasunik oqaluttariarsorluni suliaanut karakteriliisoqartassaaq.

*Imm. 4.* Inaarutaasumik angusanut tunngatillugu karakteriliisoqarneq ajorpoq ilinniarnermi sulianut (studieprojekt), aamma ilinniarnermi periutsini.

*Imm. 5.* Tunngaviusumik ingerlataqarnerup kingorna ilinniartitsissummi timersorneq C-p naammassineqarnerani angusanut tunngatillugu inaarutaasumik karakteriliisoqassanngilaq (timersornermi ataatsimoorussami).

*Imm. 6.* Nammineerlutik ilinniartunut inaarutaasunik angusanut tunngatillugu karakteriliisoqarneq ajorpoq.

§ 66. Ilinniartuq ilinniarnertuunngorniarfimmu allamut nuuttoq imaluunniit ilinniakkap sammivianik allannguisoq, taamaasillunilu ilinniartitsissutinik qaffasissuseq B imaluunniit A-miittunik naammassinninnissaminut periarfissaaruttoq, ilinniarnertuunngorniarfiup allagartanik tunniussisussaasup ilinniartitsissutitigut tamanna tunngavissaqartippagu, angusanut tunngatillugu karakterit ilinniartitsissummi inaarutaasumik angusanut karakterit ilinniartitsissummi killiffimmi appasinnerusumut nuutsissinnaavai.

§ 67. Ilinniartut allattariarsorluni misilitsinnerni angusaat ataatsimoorullugit censorinit marlunnit nalilersorneqartassapput.

*Imm. 2.* Oqaluttariarsorluni misilitsinnerni ilinniartut angusaat ataatsimoorullugit censorimit soraarummeersitsisumillu nalilersorneqartassapput, takuulli § 78, imm. 3.

*Imm. 3.* Misiliteriaatsini allani ilinniartut naliliiffigineqarneri ilikkagassanut pilersaarummi allaaserineqartut naapertorlugit ingerlanneqartassapput.

*Imm. 4.* Karakterit naliliinermi tunniunneqartut karakterit allattorsimaffiannut uppennarsarneqartassapput, taannalu nalilersuisunit atsiorneqassaaq.



§ 68. Nalilersuisut ataatsimut karakteriliinissaq isumaqatigiissutigisinnaanngikkunikku tamarmik immikkut karakteriliisassapput. Inaarutaasumik karakteriliineq agguaqatigiissitsinikkut akunnaalliliilluni tunniunneqartassaaq.

*Imm. 2.* Karakterit ataasiakkaat kiisalu inaarutaasumik karakteriliineq karakterinut allattorsimaffimmi saqqummersinneqassapput.

*Imm. 3.* Oqaluttariarsorluni misilitsinnermi ilinniartumik karakteriliinerup inenera ingerlaannartumik ilinniartumut nalunaarutigineqartassaaq.

*Imm. 4.* Allattariarsorluni suliani annertunerni karakteriliinissamut naliliineq kingusinnerpaamik misilitsinnermi suliap tunniunneqarneraniit sapaatip akunneri arfinillit qaangiutsinnagit suliarineqareersimassaaq.

### *Censorit*

§ 69. Ilinniartitsissummi pineqartumi censorit ilinniartitsissummi pineqartumi atuartitsisinnaanermut tunngatillugu malittarisassani piumasarineqartut naammassisinnaassavaat, anguniarneqassaarlu censorip ilinniartitsissummi pineqartumi atuartitsisarnermik misilittagaqarnissaa, ilinniartitsissummi pineqartumi qaffassusermi aammalu ilinniartitsissummi pineqartumi misilitsittoqartarneranut tunngatillugu misilittagaqarnissaa.

§ 70. Censorit nipangersimasussaataitanermut nalinginnaasumik malittarisassat eqqortissavaat.

*Imm. 2.* Censori ukiuni kingullerni pingasuni ilinniartitsissummi pineqartumi ilinniartunut ilinniartitsisuusimasinnaanngilaq, aammalu censori ilinniarfimmi misilitsiffiusumi atorfeqarsinnaanngilaq, taamaattoq takuuk § 72. Kiisalu censorit suliamut akuusimanninnissamut piumasaqaatinik nalinginnaasunik naammassinnaassaaq.

§ 71. Ilinniartitaanermut Naalakkersuisup censorinik atuneq taakkualu toqqarneqartarnerat ataqatigiissaagarissavaa.

*Imm. 2.* Ilinniarnertuunngorniarfik ilinniartitaanermut Naalakkersuisumut ilinniarfimmi censorinik atuinissaq pillugu inassuteqarsinnaavoq.

§ 72. Censori tassanngaannartumik pisinnaajunnaarpat, imaluunniit pissutsinik takkuttoqarpat censorip misilitsitoqarnissaanut takkussinnaajunnaarneranik kinguneqartumik, ilinniartitaanermut Naalakkersuisoq censorimik taartaasussamik toqqaasinnaavoq, tamatumani aamma censorimik ilinniarfimmi soraarummeersitsiffiusumi atorfeqartumik.

*Imm. 2.* Taartaasutut censorissap sapinngisamik annertunerpaatigut censorinut piumasaqaatit taava naammassisinnaasariaqarpai.

*Imm. 3.* Ilinniartitaanermut Naalakkersuisoq pissutissaqartumik nukiillu atorneqarsinnaasut pissutigalugit taartaasussamik censorimik misilitsinnernut qaffasissuseq C-miittumik toqqaasinnaavoq.

§ 73. Censorip nakkutigissavaa, periarfissaqarpallu peqataaffigalugu

1) misilitsinnerit ingerlanneqassasut fagitigut naleqquttumik aaqqissuussaallutik,

2) misilitsinnerit malittarisassat atuuttut naapertorlugit ingerlanneqassasut,

3) soraarummeertut assigiimmik, naapertuilluartumik tatiginartumillu nalilersuiffigineqassasut, ilinniartitaanerit malittarisassaannut naapertuuttumik, tamatumunnga ilanngullugu ilikkagassanut pilersaarutit karakteriliisarmilu nalunaarut naapertorlugit.

§ 74. Censori soraarummeersitsisuusup aqutaanik soraarummeertumut apeqquteqartarsinnaavoq.

§ 75. Allattariarsorluni misilitsinnerni censoritut ataatsimoorlutik isumannaassavaat karakterit allattorsimaffiisa eqqortumik immersorneqarnissaat, naammassineqarpatalu ingerlaannaq ilinniarnertuunngorniarfimmumt nassiunneqarnissaat.

§ 76. Censorip soraarummeersitsisoqarnerani pisunut tunngatillugu nalunaarsuutiniq allattuissaaq, kingusinnerusukkut nalunaaruteqartariaqassaguni imaluunniit maalaaruteqartoqassagaluarpat atorneqarsinnaasunik. Allattugaatit minnerpaamik ukioq ataaseq toqqortarinqassapput.

§ 77. Censori isumaqaruni misilitsinnermi isornartoqartoq, censoritut nalunaarummik suliaqassaaq, taannalu rektorimut, ilinniartitaanermut Naalakkersuisumut kopiilerlugu nassiunneqassaaq.

*Imm. 2.* Rektorip censorip nalunaarusiaa ilinniartitaanermut Naalakkersuisumut nassuiaatiminik ilallugu nassitissavaa.

*Imm. 3.* Censori qinnuigineqaruni misilitsittoqarsimanagera pillugu, inernerusullu pillugit nalunaarusiussaaq.

#### *Soraarummeersitsisut*

§ 78. Rektorip soraarummeersitsisussaaq toqqassavaa.

*Imm. 2.* Immikkut ittumik pissutsinik atuuttoqanngippat soraarummeersitsisoq ilinniartitsisut ilinniartunik atuartitsisuusimasut akornanniit toqqarneqassaaq.

*Imm. 3.* Ilinniartitsissutini arlaqartuni misilitsittoqarnerani rektori soraarummeersitsisunik marlunnik toqqaasinnaavoq, tamanna ilinniartitsissutit ilinniartitsissutaasimasut tunngavigalugit siammassissumik naliliinermi peqataasoqarnissaa pisariaqartinneqarpap.

§ 79. Censorimut ilisimatitsissutitut ilinniartullu soraarummeernissaminnut piareersarnerannut atugassatut soraarummeersitsisusup isumannaassavaa piffissap soraarummeersitsiviusup aallaartinnerani ilinniartitaanerit allaaserineqarnerannik suliaqartoqarsimanissaa, atuartitaanermi sorpiaat sammineqarsimanerannik allaaserinnittut.

§ 80. Soraarummeersitsisusup soraarummeersitsineq aqussavaa isumannaassallugu soraarummeersitsinermi allattaaviup eqqortumik immersorneqarsimanissaa.

§ 81. Soraarummeersitsisusooq soraarummeersitsinermi allattuissaaq rektorimut nalunaarusiortoqarsinnaaneranut atorneqarsinnaasunik. Allattugaatit minnerpaamik ukioq ataaseq toqqortarineqassapput.

§ 82. Soraarummeersitsisusooq piumaffigineqarnini tunngavigalugu soraarummeersitsinerup ingerlasimanera pillugu nalunaaruteqassaaq.

## **Kapitali 6** *Uppernarsaatit*

§ 83. Soraarummeernermi ilinniartut angusisimasut soraarummeersimanermut uppersaammik tunineqassapput.

*Imm. 2.* Soraarummeernermut uppersaat misilitsinnerni karakterinik, angusanut tunngatillugu karakterinik aamma ilinniartut ataasiakkaarlutik suliniutaannut karakteriliinernik imaqartassaaq, taamaattoq takuuk § 87.

*Imm. 3.* Soraarummeersimanermut uppersaammi karakterit soraarummeernermi inernerusut naatsorsorneqarneranni assigiimmik naleqassapput, teknikkimi ilinniartitsissummi A-mi misilitsinnermi karakteri aamma suliniummut suliaasimasut karakteri eqqaassanngikkaanni, taakku marloriaammik naleqartinneqassammata.

§ 84. Ilinniartunut ilinniarnertuunngorniarfimmi ilinniartitsissutinik naammassinnittunut imaluunniit ilinniarnertuutut soraarummeernatik ilinniarnerminnik taamaatitsisunut ilinniarnertuunngorniarfik tamanna pillugu atuartup noqqaaneratigut atsiukkanik (attestation) suliaqassaaq, tassanilu paasissutissiisoqassaaq ilinniartup atuartitaaneq sutigut malinnaaffigisimaneraa aammalu ingerlaavartumik naliliisarnerit qanoq inerneqartarsimanersut, kiisalu ilinniartup nalilerneqarnermi paasissutissat allat naleqquttut ilanngunneqartussatut kissaatigisai. Atsiorneq aamma paasissutissanik allanik imaqarsinnaavoq, atuartup ilinniartitsissummi qaffasissutsikkut killiffianik naliliinissamut allat tunuliaqutaqarnerannut iluaqutaasinnaasunik.

§ 85. Rektorip akisussaaffigai allagartat uppersaatillu ilinniartitaanermut Naalackersuisup killiliussaasa iluanni tunniunneqarnissaat.

*Imm. 2.* Ilinniartitaanermut Naalackersuisooq allagartat uppersaatit ilusissaannik aalajangersaasassaaq, aammalu atsiukkat ilusissaliussallugit.

*Imm. 3.* Uppernarsaatit atsiukkallu paasissutissanik allanik imaqassanngillat ilinniartitaanermut Naalakkersuisup uppersarsaasiinermut atsiukkanillu tunniussinermut ilusissarititaasut saqqummersitaata saniatigut, tamatumunnga ilanngullugu misilitsinnermi immikkut atugassaqartitsisimanermut tunngasunik imaqassanatik.

§ 86. Uppernarsaatit atsiuinerillu kalaallisut, danskisut aamma tuluttut oqaasertaligaassapput.

§ 87. Soraarummeersimanermut allagartami karakterit ilinniartup ilinniartitsissutinit allami ilinniagaaniit nuunneqarsimasinnaasut aamma nalunaarneqarsimassapput.

§ 88. Ilinniartuq karakterinik nuussinikkut angusaqarsimappat, tamanna soraarummeersimanersut uppersarsaammi nalunaarneqassaaq.

*Imm. 2.* Ilinniartuq ilinniartitsissummi karakterinik nuussinertaqanngitsumik ingerlaqqissimappat, tamanna soraarummeersimanermut uppersarsaammi nalunaarneqassaaq, ilinniartitsissutinilu soraarummeernermi inernerusut naatsorsorneqarneranni ilaatinneqassanani.

§ 89. Ilinniartuq fagimi qaffasissutsit arlaqartut iluanni misilitsittarsimappat karakterit qaffasinnerit kisimik soraarummeersimanermut uppersarsaammi ilaatinneqassapput.

*Imm. 2.* Ilinniarnertuunngorniarfik piумаффигинеqaruni misilitsinnerit qaffasissutsit sinneriniittut pillugit misilitsissimanermut uppersarsaammik suliaqassaaq.

§ 90. Ilinniartuq ilinniartitsissummi pineqartumi arlaleriarluni misilitsittarsimappat, tassunga ilanngullugu ilinniartup uteqqiisimaneratigut, karakteri qaffasinneq soraarummeersimanermut uppersarsaammi ersersinneqassaaq, ilinniartup maalaaruteqarsimanerata kingunerisaanik misilitsinnermik uteqqiisimanngippat. Taamaattoqarsimappat misilitseqqinnermit angusat soraarummeernermut uppersarsaammi nalunaarneqassapput.

§ 91. Ilinniartuq nammineerluni ilinniartutut misilitsissimappat, tamanna soraarummeernermut uppersarsaammi nalunaarutigineqassaaq.

§ 92. Soraarummeernermi karakteri agguaqatigiissitsinerusoq karakterit tamarmiusut tunngavigalugit soraarummeernermut uppersarsaammi nalunaarutigineqassaaq, taamaattoq takuuk § 83, imm. 3.

§ 93. Ilinniartuq ilinniakkami ilaatut qaffasissuseq A-mi fagit marluk sinnerlugit ingerlatsisimaguni, ilinniartuq bonusisiassanik aqqissuussinnermi A-miittunik pissarsiassaqassaaq, tamatumalu kingunerissavaa ilinniartut qaffasissuseq A-mi katillugit ilinniartitsissutinik pingasunik ingerlatsisimasut soraarummeernermi angusaqassasut soraarummeernermi agguaqatigiissitsinikkut angusat 1,03-mik amerlisarnerisigut. Ilinniartuq

qaffasissuseq A-mi ilinniartitsissutiniq sisamanik amerlanernilluunniit ingerlataqarsimappat soraarummeernermi agguaqatigiissitsinermi 1,06-imik amerlisaasoqassaaq.

*Imm. 2.* Ilinniartuq kalaallisut danskisullu qaffasissuseq A-mi taamaallaat ingerlatsisimappat, agguaqatigiissitsineq naatsorsorneqartoq ilinniartup soraarummeernermi angusarissavaa.

**§ 94.** Soraarummeernermi inernerusut soraarummeernermit uppersaammi allanneqassapput decimalinut marlunnut akunnaallillugu.

**§ 95.** Ilinniarnertuunngorniarfik tamanna pillugu atuartup noqqaaneratigut ilinniartitsissutiniq ataasiakkaanut uppersaatinik ilinniartunut ilinniartitsissutiniq ataasiakkaani naammassisaqarsimasunut uppersaatinik tunniussaqaassaaq, aamma ilinniartunut ilinniarnertuunngorniarnermik naammassinnissimangitsunut imaluunniit soraarummeernermi angusisimangitsunut.

*Imm. 2.* Ilinniartitsissutiniq ataasiakkaani misilitsissimanermit uppersaammiq nalunaarneqassapput naammassiat misilitsinneq imaluunniit misilitsinnerit naammassineqarsimasut pillugit aammalu angusanut tunngatillugu karakteriliineq inaarutaasoq ilinniartitsissummi pineqartumi tunniunneqarsimasoq.

*Imm. 3.* Ilinniartitsissutiniq ataasiakkaani misilitsissimanermit uppersaat paasissutissanik imaqaassaaq ilinniartitsissummi angusisoqarsimanersoq angusisoqarsimanginnorsorluunniit pillugu.

*Imm. 4.* Ilinniartitsissut angusiffiusimassaaq karakterini agguaqatigiissitsineq uppersaammiq nalunaarneqarsimasoq minnerpaamik E-uppat. Ilinniartitsissut angusiffiusinnaangilaq agguaqatigiissitsinerup akunnaalliinnarneratigut.

**§ 96.** Soraarummeersimanermit uppersaatit 3.G-mi soraarummeernerup naammassineraniit sapinngisamik piaartumik suliarineqassapput.

**§ 97.** Misilitsinnermit imaluunniit soraarummeersimanermit uppersaat ataasiinnaq allaqqaarneratut (original) tunniunneqarsinnaavoq.

*Imm. 2.* Ilinniarnertuunngorniarfik qinnuteqartoqarneratigut uppersaatip assilineqarneranik (kopi) tunniussisinnaavoq, allaqqaarnera tammarsimappat. Assilineqarnerata eqqussusia ilinniarnertuunngorniarfimmiit uppersarneqassaaq.

**§ 98.** Paasissutissat uppersaatinik atsiukkanillu tunniussisarnermi tunngavigineqartut ilinniarnertuunngorniarfimmi toqqortatigineqassapput minnerpaamik soraarummeernermiit misilitsinnermiilluunniit ukiuni 30-ni.

*Imm. 2.* Ilinniarnertuunngorniarfik atorunnaassappat, imaluunniit allanik pissuteqartumik pappialaatit paasissutissat toqqortarineqarsinnaangippata, imm. 1 naapertorlugu, ilinniarnertuunngorniarfiup isumannaatsumik toqqortarineqarmissaat isumannaassavaa.

*Soraarummeernermi uppersaatinik tunniussisarnermi piunasaqaatit*

§ 99. Soraarummeersimanermi uppersaatiniq ilinniartunut ilinniarnertuunngorniarluni ilinniakkamik naammassinnissimasunut tunniussisoqartassaaq, tamatumunnga ilanngullugit allami soraarummeerutigisimasaniq nuussisinaanermut nalunaarut naapertorlugu nuussisimasunut, ilinniartoq minnerpaamik E-mik soraarummeernermi agguaqatigiissitsinikkut angusaqarsimagaangat.

§ 100. Ilinniarnertuunngorniartup ilinniarnertuunngorniarnerninik naammassinniffigisaa, soraarummeersimanernut uppersaammik ataatsimoortumik suliaqassaaq ilinniartunut ini tamani ilinniarfusinnaasutut akuerisamillu misilitsiffusinnaasunut misilitsissimanerninnut uppersaatiniq tunniussisunut, misilitsissimanermi karateerit minnerpaamik E-usimappata.

§ 101. Ilinniartoq ilinniarnertuunngorniartarnermut malittarisassani fagit tulleriinnerinik sanioqqutsinissamut akuerineqarsimagaangat, ilinniartorlu soraarummeernermini minnerpaamik E-mik akunnaalliliinertaqanngitsumik angusaqarsimagaangat, ilinniarnertuunngorniartup ilinniartumut soraarummeersimanermut uppersaammik tunniussisassaaq.

*Imm. 2.* Soraarummeersimanermut uppersaamma immikkut akuersissuteqarnermut aalajangerneq nalunaarutigineqartassaaq.

§ 102. Soraarummeersimanermut uppersaammik tunniussinissamut agguaqatigiissitsineq minnerpaamik E-uppat, agguaqatigiissitsineq akunnaalliliinikkut anguneqarsinnaanngilaq.

## **Kapitali 7**

### *Naammagittaalliuuteqarsinnaaneq*

#### *Misilitsinnernut tunngasut*

§ 103. Ilinniartoq tunngavilersukkamik nammineerluni misilitsissimanermi karakterit pillugit naammagittaalliuuteqarsinnaavoq. Ilinniartoq angajoqqaatut oqartussaassuseqartunit oqartussaaffigineqarpat, angajoqqaatut oqartussaassuseqartut naammagittaalliuuteqarsinnaapput.

*Imm. 2.* Naammagittaalliuut ilinniartitaanermut Naalakkersuisumut allagartaligaassaaq ilinniarnertuunngorniartup tunniunneqassalluni.

*Imm. 3.* Naammagittaalliuut kingusinnerpaamik ilinniartup karakteriminik paasitinneqarneraniit sapaatip akunnerisa marluk qaangiunneranni tunniunneqarsimassaaq.

§ 104. Ilinniarnertuunngorniartup naammagittaalliortoq maalaarsinnaanermut ilitsersussavaa, tamatumunnga ilanngullugu naliliisoqaqqinneratigut imaluunniit misilitsiqqinnikkut karakterit appasinnerusut anguneqarsinnaanerannik.

§ 105. Maalaartoq piunasaqarnermigut suliassiissutaasimasup assilineqarneranik tunineqassaaq, aammalu allattariarsornikkut misilitsissutaasut imaluunniit suliniutitut misilitsissutaasuni allaganngorlugu akissutigisimasami assilineqarneranik tunineqassalluni.

§ 106. Maalaarneq misilitsinnermi suliassiissummut, misilitsinnerup ingerlasimaneranut imaluunniit naliliiffigineqarnermut tunngasuusinnaavoq.

§ 107. Naammagittaalliuttip suliarineqarnerani ilinniarnertuunngorniarfiup pissutsit atuuttut eqqarsaatigalugit sapinngisamik sivikinnerpaamik piffissaliilluni misilitsinnermi naliliisut maalaarummut tunngatillugu naliliinerat pissarsiarissavaa, ilinniarnertuunngorniarfiullu maalaartoq naliliisuusimasut maalaarummut naliliinerannut oqaaseqarnissaanut periarfississavaa. Naammagittaalliortumut piffissaliusaaq nalinginnaasumik sapaatip akunneranik sivilissuseqartarpoq.

*Imm. 2.* Rektorip tamatuma kingorna ingerlannaq maalaarut suliallu katersorneqarnera, tamatumunnga ilanngullugu nammineq suliame ilinniarnertuunngorniarfiup naliliinera ilinniartitaanermut Naalakkersuisumut ingerlatissavaa. Rektorip nassuiaataa imaqarsinnaavoq suliap qanoq aalajangiiffigineqarnissaa pillugu inassuteqaammik.

§ 108. Naammagittaalliuttip aalajangiiffigineqarnera kinguneqarsinnaavoq naammagittaalliortup naliliiffigineqaaqqinnissamik neqeroorfigineqarneranik, imaluunniit naammagittaalliortup naammagittaalliumminik ilalerneqannginneranik.

*Imm. 2.* Aalajangiineq naliliiffigineqaaqqinnissamik misilitseqqinnissamilluunniit kinguneqarsimappat ilinniartup aalajangiineq allaganngorlugu sapaatip akunnerisa marluk qaangiutinnginneranni akuerissavaa.

*Imm. 3.* Rektori naliliisuusullu aalajangiineq pillugu ilisimatinneqassapput.

§ 109. Nalileeqqinnissamik imaluunniit misilitseqqinnissamik aalajangiisoqarsimappat, rektorip sapinngisamik piaarnerpaamik nalileeqqittoqarnissaa imaluunniit misilitseqqittoqarnissaa aqqissuutissavaa, naliliisussanillu nutaanik toqqaasoqassalluni.

*Imm. 2.* Misilitseqqinneq napparsimaneq pissutigalugu soraarummeernermut atatillugu ingerlanneqarsinnaavoq, taannalu piffissami soraarummeersitsiffiusumi pisinnaalluni.

*Imm. 3.* Naliliisussat nutaat suliamut maalaarutaasimasut tunngasunik ilisimatinneqassapput, nutaamillu naliliineq tunngavilersorneqassalluni.

*Imm. 4.* Nutaamik naliliinermi karakterit naliliinerusimasumut taartaassapput.

*Imm. 5.* Maalaaruteqartoq, rektori aammalu naliliisuusimasut siulliit nutaamik naliliineq tunngavilersuutaasullu pillugit ilisimatinneqassapput.

#### *Pissutsit allat pillugit*

§ 110. Ilinniartuq tunngavilersukkamik nammineerlunilu ilinniarnertuunngorniarfiup nalunaarut manna tunngavigalugu aalajangiinerisimasai pillugit maalaarummik tunniussaqaarsinnaavoq. Ilinniartuq angajoqqaatut oqartussaassuseqartunit

oqartussaaffigineqarpat, angajoqqaatut oqartussaassuseqartut naammagittaalliuuteqarsinnaapput.

*Imm. 2.* Naammagittaalliuut ilinniartitaanermut Naalakkersuisumut allagartaliigaassaaq ilinniarnertuunngorniarfimmullu tunniunneqassalluni.

*Imm. 3.* Naammagittaalliuut kingusinnerpaamik maalaartup pissutsit pineqartut pillugit ilisimatinneqarneraniit sapaatip akunnerisa marluk qaangiutinnginneranni tunniunneqarsimassaaq.

*Imm. 4.* Ilinniarnertuunngorniarfiup naammagittaalliortoq maalaarsinnaanermut siunnersussavaa.

**§ 111.** Ilinniartunik ilinniarnertuunngorniarnermiit anisitsinerit eqqaassanngikkaanni naammagittaalliuutit kingumoortumik atortussaassanngillat, ilinniartitaanermut Naalakkersuisoq tamatumunnga tunngatillugu aalajangiinngippat.

**§ 112.** Rektorip naammagittaalliuut suliallu katersorneqarnera tamatumunnga ilanngullugu nammineq suliami ilinniarnertuunngorniarfiup nassuiaataa ilinniartitaanermut Naalakkersuisumut ingerlatissavaa. Nassiussineq sapinngisamik piaarnerpaamik isumagineqassaaq, kingusinnerpaamillu suliat tiguneqarneraniit sapaatip akunnera qaangiutsinnagu.

*Imm. 2.* Ilinniarnertuunngorniarfiup nassuiaataa suliap qanoq aalajangiiffigineqarnissanut inassuteqaammik imaqassaaq.

*Imm. 3.* Ilinniarnertuunngorniarfiup nassuiaasiasa ilinniartitsisunit allanilluunniit naliliinernik ilaqassappat, taava illuatungeriit akornanni tusarniaanertut aaqqissuussamik ingerlatsisoqassaaq, naammagittaalliortorlu nalinginnaasumik sapaatip akunneranik piffissaqartinneqarluni naliliinernut pissarsiarineqarsimasunut oqaaseqarsinnaatinneqassaaq.

## **Kapitali 8**

### *Atortuulersitsineq*

**§ 113.** Nalunaarut 1. februar 2015 atortuulissaaq aammalu atortuussalluni Kalaallit Nunaanni ilinniarnertuunngorniarluni ilinniartitaanermit ilinniartunut ilinniarnertuunngorniarlutik 1. august 2012-ip kingorna ilinniarnerminnik aallartitsisimasunut.

*Imm. 2.* Ilinniartunut Kalaallit Nunaanni ilinniarnertuunngorniarluni ilinniarnermik imaluunniit inuussutissarsiormermit ilinniarnertuunngorniarluni ilinniarnermik 1. august 2012 sioqqullugu ilinniartunngorsimasunut, piffissami aasaanerani soraarummeersitsinissanut piffissaliinerit ilanngullugit, tamatumunnga ilanngullugu napparsimallutik soraarummeeruteqartussanut, 2014-imi misilitsissinnaapput malittarisassat maannamut atuuttut naapertorlugit aamma Peqqussut nr. 108, 17. februar 1992-meersoq Kalaallit Nunaanni ilinniarnertuunngorniarfik pillugu aamma Peqqussut nr. 787, 20. juni 2006-meersoq Kalaallit Nunaanni inuussutissarsiutinut ilinniartitaanerit qaffasinnerusumillu niuernermit sulianut misilitsittarnerit aamma qaffasinnerusumik teknikkimut soraarummeertarnerit pillugit malittarisassat naapertorlugit, imaluunniit aalajangersakkat



pineqartunit aallaaveqartut naapertorlugit. Misilitsinnerit soraarummeernerillu malittarisassat maannamut atuuttut tunngavigalugit ingerlanneqartassapput.

Imm. 3. Ilinniartitaanermut Naalakkersuisup immikkut ittuinnartutigut ilinniamertuunngorniarfik pisinnaatissinnaavaa soraarummeersimanermut uppersaatiniq suliaqarnissaanut, misilitsinnernut nalunaarut una aamma malittarisassat maannamut atuussimasut naapertorlugit suliaqarnissamut.

Namminersorlutik Oqartussat, ulloq 23. januar 2015



Nivi Olsen



Mikael Kristensen